

祥刑典

祥刑典第二十八卷

律令部彙考十四

明

洪武二十一年令逆黨止沒其貲產丁口又令農民懶惰老人不督責者制罪 按明會典洪武二十一年令謀逆姦黨造偽鈔等項沒其貲產丁口其餘止收貲產仍以農器耕牛還之 又令河南山東農民中有等懶惰不肯勤務農業朝廷已嘗差人督并耕種今出號令此後止是各該里分老人勤督每村置鼓一面凡遇農種時月五更擂鼓衆人聞鼓下田該管老人點鬧若有懶惰不下田者許老人責決務要嚴切督并見丁著業毋容惰夫遊食若是老人不肯勤督農民窮窘爲非犯法到官本鄉老人有罪

洪武二十二年八月更定律令是年令邊塞官軍交通外境及私市者坐罪全家令各處逃軍隱藏轉送者全家充軍官吏縱容者處死又定社祭會飲圖式不遵者以違制論 按明會典洪武二十二年八月更定大明律 又令守禦邊塞官軍不得與外夷交通如有假公事出境交通及私市

易者全家坐罪

又令各處逃軍能擒獲一名者賞鈔三十錠隱藏出首者二十錠見在軍知而

首者十錠爲事充軍逃回捕獲者五錠隱藏及轉送者全家發金齒充軍逃軍自首者免罪復役官吏不卽起送縱容害民者處死

又再定圖式凡良民中年高有德無公私過犯者自爲一席坐於上等有因戶役差稅遲悞及曾犯公杖私笞招犯在官者又爲一席敘坐中門之外其曾犯奸盜詐僞說事過錢起滅詞訟蠹政害民排陷官長及一應私杖徒流重罪者又爲一席序坐於東門之內執壺供事各用本等之家子弟務要分別三等坐次善惡不許混淆其所行儀注並依原頒定式如有不遵圖序坐及有過之人不行赴飲者以違制論

洪武二十三年令死罪運米北邊又榜諭稅課司侵欺巡攔者重罪

按明會典凡納運米穀洪武

二十三年令罪囚運米贖罪除十惡并殺人者論死餘死罪運米北邊力不及者或二人併力運納又榜諭各處稅課司局巡攔令計所辦額課日逐巡辦收於司局按季交與官攢出給印信收票不許官攢侵欺致令巡攔陪納違者重罪

洪武二十四年議准諸司不守成法依律治罪奏准攢造黃冊官吏故行刁蹬及通同人戶隱瞞作

弊處以極刑令生員民間習讀大誥律令妄生異議者極刑不赦又令妄假仙佛名號私造符籙及不併居寬大寺觀雜處於外者流以重罪奏准歲貢不中者有司學官照例論罪生員充吏 按明會典洪武二十四年議准在外諸司有不守成法泛濫給驛者依變亂成法律治罪 又奏准攢

造黃冊格式有司先將一戶定式謄刻印板給與坊長廂長里長并各甲首令人戶自將本戶人丁事產依式開寫付該管甲首其甲首將本戶并十戶造到文冊送各該坊廂里長坊廂里長各將甲首所造文冊攢造一處送赴本縣本縣官吏將冊比照先次原造黃冊查算如人口有增卽爲作數其田地等項買者從其增添賣者准其過割務不失原額排年里長仍照黃冊內原定人戶應當設有消乏許於一百戶內選丁糧近上者補充圖內有事故戶絕者於畸零內補轉如無畸零方許於鄰圖人戶內撥補其上中下三等入戶亦照原定編排不許更改果有消乏事故有司驗其丁產從公定奪仍於各文冊前面本縣照依式樣類總填圖所在有司官吏里甲敢有團局造冊科斂害民或將各處寫到如式無差文冊故行改抹刁蹬不收者許老人指實連冊綁縛害民吏典赴京具奏犯人處斬若頑民粧誣排陷者抵罪若官吏里甲通同人戶隱瞞作弊及將原報在官田地不行明

白推收過割一槩影射減除糧額者一體處死隱瞞人戶家長處死人口遷發化外 又令生員

熟讀大誥律令歲貢時出題試之民間習讀大誥子弟亦令讀律又令教官人等務要依先聖先賢格言教誨後進使之成材以備任用敢有妄生異議謬惑後生乖其良心者誅其本身全家遷發化外 又令佛經番譯已定者不許增減辭語道士設醮亦不拜奏青詞各遵頒降科儀民有效瑜

珈教稱爲善友假張真人名號私造符籙者皆治以重罪 又凡各府州縣寺觀但存寬大可容

衆者一所併居不許雜處於外違者治以重罪親故相隱者流願還俗者聽 又奏准歲貢不中

者有司官任及三年者照例論罪二年者住俸半年一年者住俸三個月學官無分久近照例責罰生員食廩五年者充吏不及者復學次年復不中者雖未及五年亦充吏

洪武二十五年令鋪司接送公文不行明白辨驗致生事端者治罪又令造周知冊辨驗僧人有不同者解送治罪容留者罪同 按明會典洪武二十五年令急遞鋪接送公文須辨認果是前鋪鋪兵方許交領但有詐冒押解赴京 凡有於中途鋪分投下公文不係知識者許本鋪司兵拏解

赴京 凡有司官吏鋪長司兵有公文不行明白辨驗輕易接遞致令別生事端者治罪 又

令本司造周知冊編次在京在外寺院僧人備開各年甲姓名字行及爲僧年月并所給度牒字號頒給天下僧寺備照凡游方行脚至者以冊驗之其有不同許獲送有司解京治以重罪容留者罪如之

洪武二十六年定首領吏典報冊不實及違限者之律又定吏典給由過違者與託故不給由者之罪申鞫刑之禁又定官吏家屬干犯極刑之律及充軍罪名又令文武百官奏事不穿履襪者充軍隱瞞丁口朦朧陳告者車馬過陵違禁者同姓爲婚者戶口逃移者公文到鋪不卽遞送者拆動公文原封者巡檢縱容逃軍及船過津渡不服巡檢盤詰者縱容來歷不明者巡檢司所解囚徒販賣私鹽等項到部者各州縣所解逃軍到部發回有故推老疾或長解私放者官吏所舉陰陽醫術不堪用者各房吏典那移管事者各府州縣歲貢有濫舉者逃吏姦猾者俱按律輕重治罪 按明會典洪武二十六年凡新官到任其先任首領官六房吏典限十日以裏將各房承管應有事務逐一分割依式攢造文冊從實開報如有隱漏不實及故不依式繁文紊亂并十日以裏遷延不報者該吏各以違制律論罪有所規避從重論 又定吏員一考滿在京大小衙門及在外布政司并直

古今圖書集成

隸府州縣吏典各以三年考滿給由其倉攢典以周歲爲滿稅課司庫攢典考滿之日隨卽交割明白給由府州縣倉攢典將經收糧斛支消盡絕方許給由府州縣吏典考滿當卽給由如布政司府州縣過違一年直隸竝在京過違半年給由到部俱送法司取問如不過違者隨付司封照依資格撥用 又奏准各衙門吏三年役滿於本衙門見缺令史書吏內陞用再歷三年給由赴京如有餘吏送赴吏部不許一槩縣陞於州州陞於府府陞於布政司等衙門及王府長史司託故不給由者治罪 又申鞫刑之禁 又定凡在京及在外衙門官吏家屬干犯極刑者除總麻疎遠異姓親屬外其小功以上親例合迴避務要開寫爲因何事得何罪名係何衙門取問處決實跡親身赴京陳告行移原籍及任所并原取問衙門照勘取具官吏里鄰結狀并宗支圖本及任所官吏保結明白定擬奏准方許去官離職後令官吏有小功以上親屬干犯極刑者官於邊遠敘用吏發邊遠衙門永充吏役

又定充軍罪名 販賣私鹽 詭寄田糧 私充牙行 私自下海 閒吏 土豪 應合抄劄家

屬 積年民害官吏 誣告人充軍 無籍戶 攬納戶 舊日山寨頭目 更名易姓家屬 不

務生理 遊食 斷指誹謗 小書生 主文 野牢子 幫虎 伴當 直司

又令凡文武百官於奉天華蓋武英等殿奏事必須穿履鞵方許入殿違者從糾儀御史禮部儀禮司官糾劾送法司如律問罪 又定有陳告一戶或爲垛集首報收集或爲事問發在京在外衛

所重役充軍二名三名者須行各衛著落當該官吏保勘明白及揭照黃冊果係同戶別無人丁具奏定奪其有爲事免罪充軍正身并丁多者不准如有隱瞞丁口朦朧陳告者問罪如律 又凡

陵寢禁例令車馬過陵者及守陵官民入陵者百步外下馬違者以大不敬論 又定凡民間男

女嫁娶不許同姓尊卑親屬相爲婚姻違者律有常憲 又定凡各處戶口每歲取勘明白分豁

舊管新收開除實在總數縣報於州州類總報之於府府類總報之於布政司布政司類總達戶部立案以憑稽考仍每十年戶部具奏行移各布政司府州縣攢造黃冊編排里甲分豁上中下三等

人戶遇有差役以憑點差若有逃移者所在有司必須窮究所逃去處移文勾取赴官依律問罪仍

令復業 又定送遞公文照依古法一晝夜通一百刻每三刻行一鋪晝夜須行三百里但遇公

文到鋪不問角數多少須要隨卽遞送無分晝夜鳴鈴走遞前鋪聞鈴鋪司預先出鋪交收隨卽於

封皮格眼內填寫時刻該遞鋪兵姓名速令鋪兵用袱包裹夾板拴繫齎小回曆一本急遞至前鋪交收於回曆上附寫到鋪時刻以憑稽考毋致停滯差迷如是公文到來不卽遞送停積等待因而失悞事機者問罪 又定無印信文字不許入遞其各衙門但有入遞公文須要堅厚好紙封裹

轉遞各鋪明白附曆於上開寫并無破損并不曾拆動原封但有磨擦破壞及拆動原封者就將來文封皮上寫記原遞鋪兵姓名遞發及將遞來鋪兵拘捉解官有司卽爲追究 又定凡各處巡

檢司縱容境內隱藏逃軍一歲中被人盤獲十名以上者提問如律 又凡運糧馬快商賈等船

經由津渡巡檢司照驗文引若豪勢之人不服盤詰聽所司拏送巡河御史郎中處究治 又凡

軍民無文引及內官內使來歷不明有藏匿寺觀者必須擒拿送官仍許諸人首告得實者賞縱容者同罪 又凡各處巡檢司弓兵並老人里甲等獲解內外衛所逃軍及囚徒無縱人並販賣私

鹽犯人等項到部審問明白一次二次在逃囚軍本部照例刺字依律杖斷原伍舊軍並餘丁照例刺字若係在京軍人調發外衛在外所軍人仍發原衛著役隨營鹽徒編發充軍私鹽進納載鹽船隻驢匹入官原捕弓兵人等照例給賞其有征進在逃並三次在逃軍人及囚徒無引等項俱送法

司並原問衙門查照發落

又定凡遇各布政司并直隸府州縣勾解內外衛所逃故軍人正身

并戶丁到部審實明白逃軍照例斷發有能自首者免罪復役其補役戶丁如在京衛分填給勘合
差人送發該衛交割在外衛所送赴該府通類差人押送取收管回照仍行移各衛收役年老殘疾
發回兌換壯丁其幼小戶下無丁者年十三四以上送衛操練七八歲以下或發在營或發原籍依
親行移該衛紀錄候長成勾補其有奸頑故推老疾不將壯丁補役者問罪如律仍勾壯丁若長解
不行用心管解以致脫逃依律責限發回根捕受贓脫放送法司問罪其有民人首報投軍并遠年
歇役軍丁首報著役無衛分者照發外衛有原衛者就發充軍仍行原籍官司體勘若有規避提送
法司問罪 又定凡陰陽醫術行移太醫院欽天監考試如果堪用照例具奏引選不堪用者將
原舉官吏依貢舉非其人律付考功紀錄本人放回 又定各房吏典不許那移管事違者處斬

凡有司內吏典各有所掌房分如刑房專掌刑名戶房專掌錢糧該吏承管日久則知事首尾容易
發落近有司多聽從吏員計囑將所管房分時常遷調以致所管事務不知首尾多生情弊今後各
房若有仍前那移管事者吏處斬官別議若一房事更過十名二十名或二三名接管人人首尾不

到了時都掣來要處斬罪其有事故接管者不拘此例

又定凡各府州縣每歲於所轄隅廂鄉

都內拔選容止端謹無過人材一名申送布政司覆考轉行按察司覆考堪充歲貢開坐考過詞語差人送部應有賢良方正及山林巖穴隱逸之士並通曉經書儒士秀才孝廉者俱各訪求到官審無過犯違礙不拘名數差人伴送到部或內外官員人等薦舉人材秀才卽便行移原籍官司赴取赴部如儒士秀才出題考試果否通經賢良隱逸等項人材量其才能定其高下仍取本戶丁糧數目作何營生及戶內有無雜役事故供給明白然後發送選部選用如將鄙陋不堪之人一槩朦朧濫舉原舉官吏依貢舉非其人律問罪 又凡在逃吏每月類行勾取其有自首行勾日淺未曾撥補准首仍送著役若及日久窺伺撥補避難及已移文原籍勾解者俱送刑部問罪仍發本部聽用若各衙門退回姦猾託稱不諳吏事舊吏照地方發邊遠充軍

洪武二十七年令凡各軍守衛當直告假有或頂替虛冒等情管軍官或徇私作弊以及婦女有孕入內外人入內不由本門出者管軍官於點視時縱令代替者更或敢爲刁蹬者守衛官員交班不以時者輒放內官內使出者諸色人等出門夾帶者守衛官軍私拆文書者官員人等說謊者轉換

支吾面欺者浙淮竈戶有犯刑者守衛管軍官宜降調者百姓栽桑棗違制者僧道不遵典法者俱按律治罪 按明會典洪武二十七年聖旨榜例自古到如今各朝皇帝差軍守衛皇城務要本隊伍正身當直上至頭目下至軍人不敢頂替這等守衛是緊要的勾當若是頂替千係利害撥散隊伍守衛尤其利害且如論隊伍守衛撥那所軍若用軍多盡本所守衛若用少或五百三百二百一百務要整百戶守衛若軍別無事故各各見在衛所其當該管軍人員不行仔細檢點照依原伍上直致令小人賣放或閒居在衛所或私自縱放不在衛所點視不到定將本管指揮千百戶衛所鎮撫總小旗各杖一百指揮降千戶調邊遠千戶降百戶調邊遠百戶降總旗調邊遠衛鎮撫降所鎮撫調邊遠總旗降小旗調邊遠小旗降做軍調邊遠如是受財賣放以致隊伍不全係是圍宿重事不問贓多少處以重罪 一當直之時不問全所或一百戶上直必定無全伍何故無全伍且如父母妻子或死喪或因病或本身有病或嫁娶或公差或因事被監或種植蔬菜五穀看守果木或婦人產難此數等皆是軍人有妨上直之時理合明白開寫是數事內何等妨占自此等別無虛冒難以問罪理合逐件准說一若本無前條數事倚法爲姦妄稱數事內一事不行上直非官吏該管

容縱罪坐本軍杖一百流烟瘴若所管官旗人等受財冒爲此事不拘職多少處以重罪 一軍

人在京衛分近處不出百里之外死喪慶弔許告假行本衛親管官旗首領官吏卽時准告放行其

或敢有留難管五十上官罰俸一月 一凡當直之日務要各千戶差調本管百戶各帥本隊伍

旗軍一名一名務要著實不許頂替若有事故儘有事故開除見在不問多少從實當直若將本隊

伍一百戶軍調做三四次當直或一旗一直兩旗一直或五名一直三名一直多少不等拆散隊伍

處以重刑家遷化外 一若死喪親姻疾病產難隨卽告知本管官旗卽時放行毋得刁蹬留難

若有刁蹬留難卽時親身赴御前陳告若當直之時本身若有暴疾本管官旗卽放歸營所請醫調

治或看視遲慢放回猶豫致令病甚親管小旗杖一百總旗杖九十百戶住俸一月其病軍食錢帶

去不必瑣碎來奏 一若軍人別無餘丁家有父母或父或母一時染病不能痊可似這等軍許

不當值告知明白在家侍奉父母病疾管甚麼十日五日半月一月不拘幾時直待父母痊可纔方

上直若父母病痊及父母無病詐稱有病開驗是實治以重罪輕則流入煙瘴 一軍人單夫隻

妻者若妻有病本軍許不上直看覷妻室病痊之後纔方上直設或無病稱病病痊不直開驗是實

調入煙瘴

一若官旗首領官吏不畏法度擅將上直軍人撥散隊伍許本隊伍內不問軍旗人等赴御前陳奏開驗是實賞鈔五十錠作弊官吏處以重刑

一凡一應關請有孕婦女不許入

內違者本管官旗杖一百若不令官旗知會若孕私入者罪坐本婦

一凡當直之時守衛何門

本日外人於內辦事事畢仍於本門回還若自本門入不自本門出不問是何等人却被別門擒拿雖係國戚亦當即時奏聞區處將所入之門守直官旗軍人俱各處以重刑擒拿之門直守軍旗受

賞

一凡整點大軍本管官旗私自縱令正軍不入隊伍臨點之際却乃雇覓他人代替點視者

官旗與雇覓之人俱各處以重刑有能告首者賞鈔一百錠官首告陞一階總旗首告陞百戶小旗首告陞百戶軍人首告陞百戶仍賞鈔一百錠本管官旗自行覺舉者不在陞賞之例

一在京

軍人戶下壯丁多者或弟兄子姪或見贅在戶女婿凡遇上直做工公差許輪流代替不輪者聽若遇出征調遣正軍親行正軍輟弱戶下壯丁願隨行代替者亦聽本管官旗首領官吏敢有刁蹬者杖一百罷職總小旗首領官吏邊遠充軍

一守衛官員凡遇當直須待朝後辰時方許交班違

者問罪

一內宮內使須要比對銅符依前搜檢放出若內宮內使出門本無銅符及有銅符不

行比對明白輒便放出者守門官軍治以重罪 一各處進納官物長解及內府做工諸色人等

誤帶鈔貫等物入門守門官軍務要用心搜檢止當寄放方許進門若進門之時搜檢潔淨比候出

門搜出有帶出物件即時拿奏 一官員軍民人等入奏事務守衛官軍人等不許問其緣故所

將文書亦不許開看隨卽徑直引奏若擅問緣故及將文書開看者依律問罪 一官員人等說

謊者處斬 一凡大小官員奏事語言不一轉換支吾面欺者斬 又令兩浙兩淮竈戶有犯

管杖斷決徒流遷徙雜犯死罪者止杖一百仍發煎鹽其事故竈丁勘實以附近有田糧丁力相應

人戶撥補 又令凡降級守衛榜例管軍官犯罪指揮降千戶調邊衛千戶降百戶百戶降總旗

總旗降小旗衛鎮撫降所鎮撫所鎮撫降總旗俱調邊遠衛 又令天下百姓務要多栽桑棗每

一里種二畝秧每一百戶內共出人力挑運柴草燒地耕過再燒耕燒三遍下種待秧高三尺然後

分栽每五尺闊一壟每一戶初年二百株次年四百株三年六百株栽種過數目造冊回奏違者發

雲南金齒充軍 又令榜示天下寺觀凡歸併大寺設碇基道人一人以主差稅每大觀道士編

成班次每班一年高者率領餘僧道俱不許奔走於外及交搆有司以書冊稱爲題疏強求人財其

一二人於崇山深谷修禪及學全真者聽三四人不得私創庵堂若遊方問道必備路費毋索取於民所至僧寺必揭周知冊驗實不同者拏送有司僧道有妻妾者許諸人趕逐相容隱者罪之願還俗者聽亦不許收民間兒童爲僧違者并兒童父母皆坐以罪年二十以下願爲僧者亦須父母具告有司具奏方許三年後赴京考試通經典者始給度牒不通者杖爲民有稱白蓮靈寶火居及僧道不務祖風妄爲議論法令者皆治重罪

洪武二十八年奏准歲貢再試復不中者照例充吏教官責罰詔刑部諸司有用非法獄具者卽以非法獄具處治皂隸處死令王府公差假軍情爲由馳驛及擅應付者處死又定抄劄律令令法司擬罪引大誥是年刑部請更定律令不許按明會典洪武二十八年奏准歲貢初試不中者遣復學停廩肄業提調官教官取招生員限次年再試兩廣四川限兩年再試復不中者照例充吏提調官教官仍舊責罰又詔刑部將合用獄具依法較定與諸司遵守敢有仍前不遵者就用非法

獄具處治皂隸祇禁輒便聽從行使者一體處死聽使之際如曾用言陳告長官不從皂隸祇禁不坐又令王府公差人員但係尋常事務及各王禮節往來并不許馳驛有擅應付及假以軍情

爲由馳驛者處死

又奏准抄劄遷發律與大誥該載者宜從法司遵守其餘榜文條例該抄劄遷發者止罪本身存留戶下人口種田納糧當差

應合抄劄律令 姦黨 謀反大逆 姦黨惡 造僞鈔 殺一家三人 採生折割人爲首

大誥 攬納戶 安保過付 詭寄田糧 民人經該不解物 灑派拋荒田土 倚法爲姦 空

引偷軍 黥刺在逃 官吏長解賣囚 實中士夫不爲君用

又令法司擬罪許引大誥減等

按春明夢餘錄二十八年刑部奏律與條例不同者宜更定俾所司遵守上曰法令者防民之具輔治之術耳有經有權律者常經也條例一時之權宜也朕御天下將三十年命有司定律久矣何用更定

洪武三十年禁用黥刺荆剗開割之刑詔定私茶出境治以重罪令定罪囚運米贖罪法又定決不待時秋後處決工役終身律詔刊大明律將大誥內條目附其中 按明通紀洪武三十年上自序